

11. oktober 2017

Inatsisartut suleriaasianni § 36 naapertorlugu Naalakkersuisut peqquneqarnissaannik Inatsisartut aalajangiiffigisassaattut siunnersuut matumuuna imaattoq saqqummiuppara:

Pisortat allaffeqarfiini siunertaasutut oqaatsit ataasiinnaat atorneqalernissaannut suut aporfiusinnaasut pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Vivian Motzfeldt, Siumut)

Tungavilersuut:

Allaffissornikkut oqaatsitigut marloqiusamik ingerlatsinitta akisoqisup qimanneqarnissaa piffissanngorluinnarpoq.

Piffissanngorpoq tamakkiisumik oqaatsivut ataqqillugit allaffissornikkuttaaq ineriartortinneqarnissaat.

Naalagaaffinngornissaq ukiuni makkunani annertuumik timitalersukkamik sulissutigineqaleruttorpoq. Allaffissorneq akisoqisoq amerlassuttitsinnullu naapertuutinnigivissoq ukiorpassuarni atuut-sinneqarpoq, marloqiusamillu ingerlatsinerup suliassat eqaannerujussuarmik naammassineqar-sinnaasut ajoraluartumik piffissaq sivisoorujussuaq atorlugu ingerlanneqartarput, allaat ineriartut-saaliuinertut ilaatigut misinnartarlutik.

Nunatsinni aningaasarsiorneq aningaasanillu ingerlatsineq isumaliutigilluagaanngitsorpassuarnik tikkuartugassaqarpoq, pingaarnersiuneq ersarissumik suut toqqammavigalugit ingerlanneqassanersoq oqallisigineqarneq ajorpoq, taamaattorli ikitsigaluta oqaatsit marluiit atorlugit akisoo-rujussuarmik ingerlatsivugut.

Maani issiapput inuit tamarmik peqqissut oqaatsinik ilinniarnissaminnik aporfeqanngitsut, taamaattorli aningaasarpasuit atorlugit nutserineq apeqquserneqanngisaannarpoq.

Tamannali allamiuluarnertut imaluunniit takornartat oqaasiinik atuerusunnginnertut paasineqarnissaa kissaatiginngilara, tamannami pineqanngilaq, imalli paasineqassasoq kissaatigaara oqaatsitta ukiorpassuarni atorneqarsinnaanngitsutut naqissuserneqarlutik nikagisaallutillu inuluugineqarsimanerannik atorunnaartitserusulluta oqaatsittalu kinaassutsitsinnut aamma tungaviliisuummata, inuiaasugut ikittunnguit oqaatsiminnik piujuaannartitserusuttut ineriartortitserusuttullu.

Oqaatsivut atorlugit allaffissornikkut ingerlatsineq anguneqarpat Kalaallit 60 %-ii pallillugit qallunaatut allatulluunniit oqaaseqanngitsut naammaginnartumik aamma psirotanit sullinneqarnerat

anguneqassaaq, taamaalilluni ilutigitillugu ineriartorneq killiffitsinnillu akisussaaqataanermik misigineq tiguserlu anguneqassaaq.

Nunatsinni immikkut ittumik piginnaasalinnik pisariaqartitsineq avataaniit tikisitsinermik kinguneqassaaq piginnaasaq pisariaqartinneqartoq nunaqqatitsinnit Kalaallisullu oqaasilimmit toqqagassaaqanngippat, tikisitsinermilu siunertaasariaqarpoq tikisitap nunaqavissumik piginnaasatigut pikkorissaanissaannik akisussaaftimmik tigusinissaa angujumallugu. Tikisitap immikkut piginnaanillip nunaqavissumut pikkorissaanini naammassiguniuk tikisitap suliaassaa naammassineqarsimassaaq, taamaalilluta imminut napatittumik ingerlanerput annertusassavarput avataaniillu iluaqusersorluta ingerlasariaqarnerput annikillisarlugu, tamatuma kingunerissavaa piginnaanitsinnik ingerlatitseqqiisarnerput uatsinnit toqqammaveqarluni ingerlaavartunngortinneqarnera.

Neriuutigaara oqallinneq siunertaqarluartumik inerititaqarfiulersussatut torersumik ingerlanneqarumaartoq - oqallilluarisi.